

ANWAR SAH TANDING ATAS TIKET BN

KUALA LUMPUR, Selasa — Bekas Presiden ABIM, Encik Anwar Ibrahim hari ini mengesahkan beliau akan bertanding atas tiket Barisan Nasional dalam pilihanraya umum, 22 April depan.

"Jika diberi peluang saya tetap bertanding, tapi saya tidak dapat menjelaskan kawasan yang akan ditandingi," katanya dalam satu pertemuan di pejabat ABIM, di sini.

Bagaimanapun, besar kemungkinan beliau akan bertanding di Permatang Pauh menentang calon PAS.

"Jika saya umumkan untuk bertanding di sesuatu kawasan orang akan menganggap saya 'besar diri'. Biarlah perkara ini diputuskan oleh Datuk Seri Dr. Mahathir Mohamad sendiri atau Datuk Abdullah Haji Ahmad Badawi selaku Ketua Perhubungan UMNO Pulau Pinang," katanya lagi.

Encik Anwar yang mengumumkan penyertaannya dalam UMNO semalam berkata, beliau berbincang beberapa kali dengan Perdana Menteri mengenai peranan yang boleh dimainkan dalam parti.

"Hari ini juga saya berbincang dengan Timbalan Perdana Menteri, Datuk Musa Hitam mengenai perkara yang ada kaitan dengan pilihanraya," katanya yang cagang mengulas inti pertemuan itu.

Encik Anwar juga berkata, beliau akan turut berkempen berlandaskan semangat keislaman dan keadilan serta mengajak orang ramai menyokong UMNO.

UMNO, katanya, adalah sebuah parti Melayu terbesar dan peranannya di negara kini kian ketara. "Jadi orang-orang Melayu harus menyokongnya."

Beliau juga berkata, isu keislaman dan keadilan akan diperjuangkan khususnya ini. "Itu pun berdasarkan kemampuan saya berkempen sebagai ahli UMNO biasa," jelasnya.

Beliau juga menafikan kononnya ABIM akan berpecah belah dengan ketiadaan beliau sebagai presidennya.

ABIM, katanya, bukan parti politik dan tidak pernah menyebelah mana-mana pihak. "Jika ada pun hanya ahli-ahli itu sendiri secara individu menyokong parti-parti yang disukaiinya."

Menurut Encik Anwar, beberapa Jawatankuasa Tertinggi ABIM sedang melawat di beberapa negeri untuk menjelaskan kedudukannya meninggalkan jawatan sebagai presiden.

Ketika ditanya mengapa ingin sekarang beliau ingin aktif berpolitik, beliau berkata: Selama 10 tahun lalu saya ingin menghidupkan ABIM sebagai sebuah perantaraan yang kuat dan berpengaruh.

"Kini jelas, ABIM kian kukuh dan jika saya tidak menjadi presidennya pun ABIM akan terus bergerak aktif," ujarnya lagi.

Bagaimanapun, beliau tidak menafikan, pemerintahan baru Datuk Seri Dr. Mahathir yang lebih menitikberatkan hal-hal keislaman menggerakkan beliau berkecimpung dalam UMNO.

Bahan asal dari Arkib
Negara Malaysia